

# ISIBONAKALISO SIKAMESIYA



Asikhothamiseni amakhanda ethu okwesikhatshana.

Nkulunkulu Othandekayo, lapho sisizwa leyo ngoma, “UJesu useduze, lezinto zonke ziyenzeka,” kuthokozisa inhliziyi zethu ukwazi ukuthi lokho kwedlula ingoma. KuliQiniso. Ulapha. Nkosi, ngiyakholwa Ubu ngemuva nje kwethabhanekeli khathesi nje, njalo; lowo mama omncinyane ebambe lowomntwana, emanzi nte, ngezulu; futhi lelojaha libizela othandekayo wakhe, khonale esibhedlela, esifa. Zwana imikhuleko yethu, Nkosi. Kulabantu abahlezi kulelibandla usuku lonke, kusukela ngehola lesithupha nta lokhu kusa. Balindele ukukuBona, Nkosi. Basizwe sikhuluma lamuhla ukuthi Wavuka kwabafileyo. Futhi UnguJesu ofanayo olokhe ephila lobubusuku, ngemva kweminyaka engamakhulu alitshumi lesificamunwemunye. Ulokhu unguJesu. Futhi siyakhuleka, Nkulunkulu, ukuthi Uzasilisa wonke umuntu ogulayo oseBukhoni baPhezulu. Makungabi lomuntu obuthakathaka phakathi kwethu lapho linkonzo isiphelile. Sitshengise nje, Nkosi, ukuthi Ulapha.

<sup>2</sup> Sicabanga ngamadoda amabili kulokho kusa kwePhasika, ayedangele, kungela kuthandabuza, kodwa abanengi lapha badangele lobubusuku, bayagula futhi abangeke baphile, odokotela sebedadelile, futhi lapho behamba endleleni yabo, kwakuloMfokazi Owaphuma futhi wakhuluma labo, wakhuluma ngeMibhalo, usuku lonke. Futhi ngesikhathi sobusuku, lapho Ebangenisa ekamelweni futhi wavala umnyango, Wenza enye into. Wakwenza ngendlela nje Akwenza ngayo ngaphambi kokubethelwa, futhi babakwazi ukuthi leyo kwakuyiNkosi evukileyo. Wanyamalala emehlweni abo. Bagijima ngokuphangisa, bebuyela ukuyatshela abanye, “Uvukile kwabafileyo.”

<sup>3</sup> Nkulunkulu, siyakhuleka ukuthi Uzabuya phakathi kwethu lobubusuku futhi enze izinto Azenzayo ngaphambili kokubethelwa Kwakhe. Iminyaka engamakhulu alitshumi lesificamunwemunye akusilutho Kuye; UyilaPhakade. Futhi makuthi abanengi lapha lobubusuku bagijimele ngekhaya, betshela umfazi wabo, indoda yabo, abathandekayo babo, umakhelwane wabo, “Uyaphila! Ubonakale kimi lobubusuku! Usilise umkhuhlane wami! Ngizakuphila manje.” Siphe lokhu, Baba. Sikucela eBizweni likaJesu. Amen. (Lingahlala phansi.)

<sup>4</sup> Ngiyaxolisa ukuthi ngitshe ilizwi, kodwa bengiphathekile nje kakhulu ngikhuluma, ngibhaphathiza; ngaba lomvimbano, okokuqala, selokhu ngaphenduka ngivela phansi eFlorida futhi laphetsheya ezihlengeni. Kufanele ngisuke ekuseni

manje, ngisiya eCalifornia, okungaba yinyanga egcweleyo okwemihlangano. Ngakho ngacela uMfowethu Neville nxa engangikhulumela lobubusuku, futhi ngileqiniso lizwe umbiko omangalisayo. Sikholisile inkonzo yalokhu kusa evela kuMfowethu Neville. Futhi siyathemba ukuthi uNkulunkulu uzaqhubeka ukuba laye lebandla leli, lapho eselusa lapha.

<sup>5</sup> Manje ngihlangane loBilly phandle lapho, futhi wangathi wangithinta ohlangothini, futhi wathi, “Baba, abantu bamile lapha, labanye babo bebelapha usuku lonke.”

<sup>6</sup> Ngathi, “Awu, ngiyathokoza ukuthi inkonzo zethu ziyasondela duzane lokuphela, ngakho kaliyikudinga ukuthi lime.” Futhi kuyana. Futhi lapho ngingena esakhiweni, indoda lomkayo abancinyane bebephuma phandle kwemota lapho, lengane encinyane egulayo, futhi imanzi nte. Wayengeke angene ngitsho eminyango. Kodwa ngokuqiniseka njengoba ngimile lapha, uNkulunkulu wasilisa leyongane, bemile phandle lapho. Um-hum. Uphendula kanjani umkhuleko!

<sup>7</sup> Futhi manje emva kokuba sitshumayele lamuhla, lalokhu kusa ngitshumayele ngezifundo ezinhlanu: *Ephila*, *Esifa*, *Engwatshwa*, *Evuka*, *Ebuya*.

Ephila, Wangithanda; esifa, Wangisindisa;  
Engwatshwa, Wathwalela izono zami kude;  
Evuka, Walungisisa ngesihle lanininini:  
Ngolunye usuku Uyeza—o, suku  
lwenkazimulo!

Sahlala, sikhangele lobubusuku, silindele ukubonakala Kwakhe.

<sup>8</sup> Ngani siminyene phakathi lapha? Kungani abantu bebuya ukuzokuzwa iVangeli? Kukanti, ebululeni Balo, Likhadi elikhulu elidonsayo umhlaba ongakaze ube lalo. UJesu wathi, “Nxa Ngingaphakanyiswa, Ngizakudonsela abantu bonke Kimi.” Manje into yikuthi, linkolo esikhuluma ngayo, ngabe iqotho na? IliQiniso na? Nxa iliQiniso, khona-ke singakholwa lonke iLizwi iBhayibhili elalitshoyo. Nxa kungayisilo Qiniso, akufanelanga sibe lolutho lokwenza lalo, kumele sihambe nje ezonweni zethu; sidle, sinathe, ngoba kusasa siyafa. Kodwa ngilokubonga kakhulu ukubakwazi ukuthi Lokhu esikhuluma ngakho liQiniso! Futhi yiyo kuphela inkolo emhlabeni . . . Kanti, ngeyesine kunombolo, kukanti yinkolo kuphela emhlabeni ukuthi uMsunguli wayengafa futhi avuke njalo, futhi uyaphila lobubusuku.

<sup>9</sup> Ngibonile ephepheni, lapha ephepheni ledolobho ngolunye usuku, lapho abathola khona umuntu, umBhuda, owayevusiwe. Abanengi benu lakubona lokho ephepheni. Balomuntu ongumBhuda omncinyane owenza izinto njenga lokho uBhuda wenza; yebo, kenzanga izimangaliso, kodwa imfundiso yakhe lakho konke kwakunjengoBhuda. Nxa uBbhuda elomuntu

enkundleni, owamanga; uNkulunkulu uloMoya oNgcwele enkundleni, uMoya kaNkulunkulu weqiniso.

<sup>10</sup> Manje, sakhuluma ngalezi izinto ezimangalisayo, kodwa kungasebenza na? Ngabe uMoya oNgcwele...Ngabe uMoya oNgcwele engathethelela umuntu izono zakhe na? Ngabe Engamsilisa imkhuhlane yakhe na? Ngeqiniso, Uzakwenza. UnguNkulunkulu, kuze kube ninilanini. Manje, nxa singa... Nxa uJesu engabuya phakathi kwethu futhi azifakazele Sibisakhe, ukuthi Uyaphila, lapha lobubusuku phakathi kwethu, kufanele kwenze omunye wethu sonke sikholwe isithembiso sonke Alaso eBhayibhilini.

<sup>11</sup> Kukhona yini lapha ongakaze abe khona komunye wemihlangano yami? Asiboneni izandla zenu, labo abangakaze babe semhlanganweni ngaphambili. Khangela nje, phose ingxenye yexuku!

<sup>12</sup> Kangisuye umsilisi. Angikholwa—angikholwa ukuthi kulomuntu ongumsilisi. UJesu Khristu unguMsilisi.

<sup>13</sup> Futhi Wathi, lapho Elapha emhlabeni, ukuthi uNkulunkulu wayenguMsilisi. Manje, lapho Elapha emhlabeni, Akazange azitsho ukuba unguMsilisi, kodwa Watshengisa ebantwini isibonakaliso Sakhe sobuMesiya, futhi leso sibonakaliso sikaMesiya kwakuyikubakwazi imfihlo zenhliziyo yabo. Bangaki abakwaziyo lokho kuliqiniso?

<sup>14</sup> Lapho Etshela uPhetro, lapho esiza phambi Kwakhe, ukuthi ibizo lakhe lalingubani, ukuthi ibizo likayise lalingubani; UPhetro wakholwa ngendlela enjalo, ngokholo olunjalo, ukuthi uJesu wamnika izihluthulelo zoMbuso, ngokuya kwesikhathi, futhi wambeka phezu kweBandla.

<sup>15</sup> Lapho uFiliphi efumana uNathaniyeli ngaphansi kwesihlahla, futhi wamtshela, “Woza ubone Lowo engimfumeneyo, uJesu waseNazaretha, indodana kaJosefa.”

<sup>16</sup> Futhi lowo wenkolo oqinileyo wathi, “Kungaba lento enhle engaphuma eNazaretha?”

<sup>17</sup> Wamnika impendulo enhle sibili umuntu loba ngubani angayinika. Wathi, “Woza ubone. Ungakuchothozi nje. Woza, uzibonele ngokwakho.”

<sup>18</sup> Futhi masinya lapho uFiliphi esiza loNathaniyeli, uJesu wathi kuye, “Khangalani umIsrayeli, okungekho nkohliso kuye!”

Wathi, “Ungaze nini, Rabi?”

Wathi, “UFiliphi engakakubizi, Ngikubone ngaphansi kwesihlahla.”

Wathi, “UyiNdodana kaNkulunkulu, iNkosi yakoIsrayeli.”

<sup>19</sup> Watshela umfazi emthonjeni lokho okwakusenzliziweni yakhe. Izinto lezi zatshengisa ukuthi WayenguMesiya. Futhi nxa

lowo Mesiya evukile kwabafileyo lamuhla, futhi enze inhlawulo, futhi wasilisa imikhuhlane yethu futhi wathethelela izono zethu, khona-ke into kuphela Ayengayenza kwakuyikuphinda ukutshengisa leso sibonakaliso esifanayo njalo, ukuthi Ulokhu ephila ukwenza loba siphilisa isithembiso Asenzayo, kuhle. Kuliqiniso lokho na? Asikukholweni lokho manje lapho sikhuleka.

<sup>20</sup> Nkosi, abantu balindele. ILizwi elilodwa elivela Kuwe lizakwedlula uMfowethu Neville kumbe engingawatsho ezikhathini ezinengi zempilo. Ilizwi elilodwa kuphela. Manje, kulengxenywe yalumbuthano abangakaze babone imihlangano ngaphambili. Nkosi Nkulunkulu, Mdali wamaZulu lomhlaba, thumela Amandla kaJesu Khristu kulelikamelo, Lowo ovukileyo, uMoya oNgcwele owabuya ePhentekhosti, futhi makuthi Agcobe abantu. Makuthi ngenelise, ngitsho lasekutsheni kwelizwi, ukuzinikela sibisami ngokugcweleyo eMoyeni Wakhe, ukuthi Engakhuluma ngalelizwi elephukileyo engilunikeza Kuye, ekhangele ngalawamehlo engiwanikeza Kuye, ukutshengisa imibono lezinto ezizakwenza abantu babone ukuthi Wavuka kwabafileyo. Futhi lapho abantu laba bebona lokho, makuthi umbuthano wonke usingathe isithembiso sonke Asenzayo. Nxa bonile, makuthi baMsingathe okokuxolelwa. Nxa belemikhuhlane, mababekwazi ukuthi ngamanxeba Akhe thina sisilisiwe. Siphe khona, Nkosi. Siyakucela eBizweni likaJesu. Ameni.

<sup>21</sup> Manje yikutshengiselana okukhulu. Lapha, phambi kwabantu abangamakhulu amabili kumbe amathathu, kulula. Lapho usima phambi kwenkulungwane ezingamakhulu amahlanu, ingxenywe yesigidi, izinto ezifanayo zithathi ndawo. UnguNkulunkulu. Manje bangaki phakathi lapha abagulayo futhi befuna ukukhulekelwa, phakamisani izandla zenu. Bona, phose ingxenywe yenu, kumbe okwedlulisileyo. Angeke ngibalethe bonke phezulu lapha. Ngicabanga . . . Kuzamele ngicele uBilly futhi. (Mbuze nxa enikeze amakhadi okukhulekelwa. Manje, u—ukwenzile na?) [Umfowethu uthi, “Yebo.”—Mhl.] Kulungile. Kulungile.

<sup>22</sup> ISonto edluleyo kumbe isikhathi esedluleyo ngilapha, kabazange banikeze amakhadi okukhulekelwa, futhi ngabuza nje, “Bangaki abantu lapha abangakaze babe semhlanganweni ngaphambili?” Abanengi baphakamisa izandla zabo, ukuthi kabakaze babe semhlanganweni. Lapho bemile lezandla zabo ziphakeme, uMoya oNgcwele waqhubeka, ebatshelela ukuthi babengobani futhi lokuthi izifo zabo zaziqini, lalokho okwakuthethe indawo; futhi wasilisa abantu ngokupheleleyo, kwaze kwathi amathumba lezinto kwanyamalala, kwaze kwathi ukuhlinzwa kungasenziwa. Bangaki ababelapha ukubona lokho amaviki amalutshwane edluleyo?

<sup>23</sup> Nxa enikeze amakhadi okukhulekelwa, khona-ke

sizakubiza. Lokho kunika abantu bekhaya, futhi hatshi abantu bekhaya; abantu abakade besemhlanganweni, abantu abangazange; ukubuya emzileni wokukhulekelwa. Angeke sibathathe bonke phezulu lapha ngasikhathi sinye. Sizakubaletsa nje ngokuthula esingakwenelisa.

<sup>24</sup> Futhi ngifuna ukuthi libe ngabathembekileyo loNkulunkulu. Woba ngothembekileyo ngokwakho. Futhi nxa uJesu Khristu engabuya phakathi kwethu futhi enze futhi enze njengalokho Akwenzayo lapho Elapha emhlabeni, ehamba eGalili, kufanele liMamukele kuloba yisiphi isidingo elilaso. Akudingi ukuba ubephezulu lapha kupulatifomu. Ukhangela ukhoho. Kuzakube kulabanye abantu lapha abagulayo phandle lapho kumbuthano, abangela ngitsho ikhadi lokukhulekelwa, bazaliswa kungenani. Bangaki abagulayo futhi bengelakhadi lokukhulekelwa? Phakamisani izandla zenu. Awu, akulamakhadi okukhulekelwa amanengi kakhulu anikeziweyo, bona. Kulungile, kholwa nje wena. Khangela nje ngapha.

<sup>25</sup> Wothi ngilithengise lokho uJesu akwenzayo lapho Elapha emhlabeni. Kwakulomfazi, ngesinye isikhathi, weza Kuye. futhi wayengenelisi ukungena exukwini. Wayengelakhadi lokukhulekelwa, kodwa wathinta umphetho wesambatho Sakhe, ngoba wathi enhliziyweni yakhe, “Ngiyazi ukuthi lowoMuntu ukhuluma iQiniso. Nxa ngingathinta isambatho Sakhe, ngizaphila.” Futhi wathinta isambatho Sakhe, waphuma phakathi kombuthano mhlawumbe izikhathi ezinengi kakhulu kulalokho.

UJesu watshibilika, futhi wathi, “Ngubani oNgithintileyo?”

<sup>26</sup> UPetro laye waMkhuzi, futhi wathi, “Kungani Ubuza into enjalo, lapho bonke bezama ukuKuthinta?”

Yena wathi, “Kodwa ngiyabona ukuthi sengibebuthakathaka.”

<sup>27</sup> Imibono ibangela ukuba buthakathaka. Awungeke ukwenze, uye khatshana layo. Futhi Wathi, wakhangela phezu kombuthano waze Wamfumana umfazi, futhi wamtshele ukuthi wayelohlupho lwegazi, lokholo lwakhe lwamenza waphila.

<sup>28</sup> Bangaki abakwaziyo lokho? IBhayibhili lakhuluma ukuthi, “UJesu Khristu lamuhla unguMpristi oMkhulu olokuzwelana lobuthakathaka bethu.” Kunjalo na? Awu, nxa WayenguMpristi oMkhulu, olokuzwelana lobuthakathaka bethu, wayengasoze nje Enze njengalokho Akwenzayo lesosikhathi, nxa Engofanayo izolo, lamuhla, lanininini?

<sup>29</sup> Khona-ke lina elingelakhadi lokukhulekelwa, khangela ngapha, futhi uthi enhliziyweni yakho, “Nkosi, ngiyakholwa ngenhliziyo yami yonke, futhi ngiyakholwa ukuthi Uzakungisilisa. Futhi mangithinte isembatho Sakho. Futhi Ukhulume ngoMfowethu Branham futhi umtshele, njengalokho

Owakwenzayo umfazi, futhi ngizakuKukholwa.” Ungathembeka kanjalo, futhi ukholwe uNkulunkulu ngenhliziyo yakho yonke?

<sup>30</sup> UBilly Paul uthe, uthe imizuzu emilutshwane edluleyo, emile lapha, lingithathele umnikelo wothando. Bengingafuni lokhu kwenzakale. Lokho kwaku... Kodwa, ngiyabonga, ngokufanayo nje. Ngiyakufuna manje ohambweni lwami lweCalifornia. Ngizakubeka eVangelini.

<sup>31</sup> Leyominikelo emincinyane elinginika yona, liyazi lokho okwenzakala kiyo? Ngahamba ePuerto Rico laseJamaica amaviki amalutshwane adluleyo, lapho ababhala khona inkulungwane ezingamatshumi amane abaphendukayo ngobusuku obuyisificamunwemunye. Kuyini okwakwenzayo? Okwetshumi kwenu. Lapho ngisuka, umeya we... umahluleli wesihlengi waphakama, wathi, “Silabavangeli abangena phakathi lapha futhi bathatha iminikelo emikhulu, futhi kwadla imali enkulu. Kodwa,” wathi, “lapho uMfowethu Branham esiza, akazange acele ngitsho ipeni yemali, kazange asicele ukuthi sibhadale imbhadalo yewotela yakhe. Futhi wazibhadalela uhambo lwakhe, ukuhamba lokuphenduka.” Kuyini okwakwenzayo? Imali yenu. Ngifuna ukuba leqiniso ukuthi ngiyisebenzisa kahle. Ngakho, eSihlalweni sokwaHlulelwa, lapho ngisima phambi kwenu loNkulunkulu, kuzamele ngikuphendulele, ukuthi kwenziwe kahle. ngayithatha sibisami, ingqe ngisenelisa ukuhamba, ukwenza okukhulu engingakwenelisa okwenkazimulo Yakhe.

<sup>32</sup> Manje asingeke silethe wonke amakhadi okukhulekelwa ngasikhathi sinye, ngakho ngizakuwaletha nje, amalutshwane nje ngesikhathi.

<sup>33</sup> Ngubani olekhadi lokukhulekelwa lokuqala? Ungaphakamisa isandla sakho, nxa ungenelisa ukusukuma? Ngale emuva ngemuva, likhosikazi elinsundu. Woza khona phansi ngapha, khosikazi. Woza phansi futhi ubuye lapha eceleni kwepulatifomu. Manje ngubani olekhadi lokukhulekelwa lesibili? Nxa ungenelisa ukusukuma, phakamisa isandla sakho, ikhadi lokukhulekelwa lesibili. Ikhosikazi elimhlophe lapha. Kulungile, khosikazi, wena woza phezulu futhi ulandele lelikhosikazi elinsundu phezulu lapha, khona phezulu lapha. Manje baletheni khona ngaleyo ndlela, Doc, masinyane lapho lokhu kugwaliswa lapha.

<sup>34</sup> Ikhadi lokukhulekelwa, lesithathu, ungaphakamisa isandla sakho, nxa ungenelisa? Indoda emnene khona ngalapha, mnumzana. Elesine, ungaphakamisa isandla sakho na? Kulungile, khosikazi, ngaphezulu ngapha. Elesihlanu, ungaphakamisa isandla sakho? Lelijaha elincinyane khona lapha. Kuze kube kathesi, bonke ngamunye wabo ngabafokazi kimi. Elesithupha, ungaphakamisa isandla sakho na? Elesithupha. Ngibizile yini elesihlanu, elesihlanu?

Futhi elesithupha, njalo umfokazi kimi. Elesikhombisa, ungaphakamisa isandla sakho na? Phakamisa isandla sakho, ngubani olelesikhombisa. Kulungile, ngiyakholwa ngiyamazi lowomfo. Ngi—ngiyakholwa ngiyamazi. Elesificaminwembili, ungaphakamisa isandla sakho, nxa ungenelisa? Ikhosikazi phezulu lapha. Kulungile, elesificamunwemunye. Kulungile, khosikazi. Eletshumi. Kulungile, eletshumi, ikhosikazi.

<sup>35</sup> Kulephutha kwenye indawo. Ngelesingaki kulindoda lapha? Omunye umuntu angakhangela, abanye benu ma-asha wozani lapha futhi libone. [Udade uthi, “Ungamatshumi ayisificaminwembili lane.”—Mhl.] Amatshumi ayisificaminwembili lane. Ngeletshumi ebengilibiza khonake, ngiyabonga, eletshumi. Kodwa sizafika kuwe kungenani. Lokho kulungile. Khangela, ngiyakwazi ukuthi inombolo yakho iyini manje. Ngamatshumi ayisificaminwembili lane, bekungayisikho na, uthi amatshumi ayisificaminwembili lane kumbe enye into enjengalokho? Kulungile, wena mana nje lapho. Kholwa nje. Ngiyakutshela, nxa ungasebenzisi lelokhadi, ikhadi lokukhulekelwa, wena khangela ngapha futhi ukholwe uNkulunkulu, futhi ubone nxa uNkulunkulu engakuphendula umkhuleko. Kulungile.

<sup>36</sup> Inombolo, bekulitshumi lelo na? Itshumi lanye. Kulungile, itshumi lambili. Manje, nxa ungenelisi ukusukuma, nje... Eletshumi lambili. Itshumi lantathu, eletshumi lantathu, emuva khonale. Itshumi lane, eletshumi lane, khonale phakathi ngemuva. Eletshumi lanhlanu.

<sup>37</sup> Bawanikeze loba ngaphi. Abafana abawanikezileyo, bathi nje, “Ngubani ofuna ikhadi lokukhulekelwa? Phakamisani izandla zenu.” Bayawathatha bawahlanganise wonke, akulamuntu owaziyo ukuthi ngubani othola liphi. Futhi bawanikeza ngaleyondlela.

<sup>38</sup> Eletshumi lane. Eletshumi lanhlanu, ngubani olekhadi lokuthandazelwa itshumi lanhlanu, eletshumi lanhlanu? Eletshumi lesithupha, khonale phakathi ngemuva. Eletshumi lesikhombisa. Manje, nxa eletshumi lesithupha lisesakhiweni kumbe limile phakathi komkhandlo wokudlula ezihlalweni, zenzele indlela ngalapho. Inombolo... Ngiyaxolisa, angibonanga isandla sakho, dade, phezu kwakho. Ungeletshumi lesithupha? Kulungile... [Udade uthi, “Itshumi lesikhombisa.”—Mhl.] Itshumi lesikhombisa. Itshumi lesificaminwembili, itshumi lesificamunwemunye, inombolo yetshumi lesificamunwemunye. Matshumi mabili, Elamatshumi mabili, indoda ngangapha. Kulungile. Kulungile.

<sup>39</sup> Manje ngiyakholwa sesiphuma khona phandle phakathi komkhandlo wokudlula ezihlalweni lapha manje, ngakho siza... [Umfowethu uthi, “Kwenele.”—Mhl.] Utheni? [“Lokho

kwanele.”] Lokho kwanele okwesikhathi. Kulungile. Awu, khangelani ngapha futhi likholwe. Kulungile.

Kasibone, nxa umkhalisi wepiyano, ngokuphansi langokuthuleyo, *Kholwa Kuphela*, phansi nje sibili.

<sup>40</sup> Inengi labantu phakathi komkhandlo wokudlula phakathi kwezihlalo lapha ngabafokazi kimi. Kangilazi. Manje kulabanye phakathi lapha abalokhu belamakhadi okukhulekelwa, abanye mhlawumbe kabalamakhadi okukhulekelwa. Mhlawumbe singabiza abanye abanengi emzileni wokukhulekelwa ngemizuzu emilutshwane nje, masinya lapho siqondisa umkhandlo wokudlula phakathi kwezihlalo.

<sup>41</sup> Ngiyakholwa leyondoda emnene lapha, Doc, ubesiza evela ngemuva lapho, ubiziwe, itshumi lesithupha kumbe isikhombisa... itshumi lesithupha. Kulungile, woza khona ngalapha futhi uthathe isikhundla sakho, mnumzana.

<sup>42</sup> Manje, nxa ungabizwanga, lokho akulanto eyodwa yokwenza ngakho, bona, khangela nje futhi ukholwe.

<sup>43</sup> [Umfowethu uthi, “Lokhu ngiswela eletshumi lanhlano, futhi.”—Mhl.] Eletshumi lanhlano liyaswelakala. Mhlawumbe umuntu angeke asukume. Nxa ungeke usukume... Omunye kakhangele ikhadi lomunye elokukhulekelwa, mhlawumbe uyisacuthe futhi akenelisi ukuzwa. Nxa belapha, itshumi lanhlano, uyemukelwa ukuthatha indawo yakho emzileni. Nxa bephumile futhi bezaphenduka ngemizuzu emilutshwane, babekeni emzileni njengalokho inombolo yabo ibiziwa.

<sup>44</sup> Lapho sisehla phansi ngomzila lapha, sizabiza abanye futhi, nxa uMoya oNgcwele ungakhangeleki ugcoba isakhiwo, abantu, ukuze basiliswe.

<sup>45</sup> Manje, manje yisikhathi esinzima, manje yisikhathi lapho engingabe ngikhulume iQiniso kumbe ngikhuluma amanga. Manje yisikhathi lapho uJesu Khristu efakazelewa ukuthi uvukile kwabafileyo, kumbe Akavukanga kwabafileyo. Manje yisikhathi Engofanayo izolo, lamuhla, lanininini, kumbe Akafani izolo, lamuhla, lanininini. Manje Kumele afakazele ukuba unguMsilisi, kumbe Akasuye uMsilisi. Futhi nxa omunye engafuna ukuthatha indawo yami, ukukhulekela abagulayo, uyemukelwa ukubuya futhi uthathe indawo yami.

<sup>46</sup> Bangaki abenu emzileni wokukhulekelwa lapha, njengoba likhangela lapha, labo abasemzileni wokukhulekelwa manje, abangangaziyo, futhi uyazi kangikwazi kumbe ulutho mayelana ngawe, phakamisani izandla zenu.

<sup>47</sup> Phakathi kombuthano, abaziyo ukuthi kangazi lutho ngani, phakamisa isandla sakho (kukanti uyagula) phakathi kombuthano. Bona, nanko-ke.

<sup>48</sup> Manje kuyini uNkulunkulu azakwenza? Nanko uMbhalo, uMoya kaNkulunkulu ulapha, manje uzakusebenza na? Nxa



ngingazinikela sibisami kuMoya oNgcwele, kuzasebenza. Futhi akusoze kusebenze kimi ngaphandle uzinikele isibisakho kuMoya oNgcwele, “Ngoba imisebenzi eminengi elamandla uJesu wayengelakuyenza elizweni Lakhe uQobo, ngenxa yokungakholwa kwabo.”

<sup>49</sup> Manje kholwa ngenhliziyo yakho yonke, woba ngohloniphayo sibili ngongakwenza. Mana uthule, khangela. Uba uMoya oNgcwele ungenza enye into, thokoza-ke, ukholwe-ke.

<sup>50</sup> Manje, Nkosi, konke lokho esilakho, konke lokho esiyikho... Bame imilenze yabo yaze yabanjwa yinkantsho, bahlale baze baphose balungela ukuqaleka. Manje, Nkosi, makwaziwe ukuthi Wena unguNkulunkulu. Futhi ngibize lumbuthano ndawonye, ngokulaya Kwakho. Futhi ngimile lapha, hatshi ukubonwa, kumbe hatshi ukuzama ukwenza okukhulu kumbe enye into eyahlukileyo, kodwa kungenxa yokuthi ngumlayezo olayelwe kimi ngeNgilosi, futhi waqiniswa ngeLizwi Lakho. Makwaziwe lobubusuku ukuthi UnguJesu Khristu, iNdodana kaNkulunkulu, owavuka kwabafileyo; futhi uPhila eBandleni Lakho, ebantwini Bakho, ukwenza lokuletha inkonzo efanayo Owawulayo lapho Ulapha emzimbeni wenyama. Siphe khona, Nkosi. Futhi sizakuDumisa, eBizweni likaJesu Khristu. Amen.

<sup>51</sup> Manje ungaphi uBilly Paul, ngabe ekulesisakhiwo na? Ngabe esehambile? Kumbe, omunye umuntu kumele abuye lapha ukuzothatha lawa amakhadi okukhulekelwa, bona. Woza, Mfowethu...?..Umfazi ulekhadi lokukhulekelwa esandleni sakhe. Linikeze nje kuye, bona.

Hlonipha sibili manje.

<sup>52</sup> Manje ikhosikazi leli lapha, ngokwazi kwami, ungumfokazi ophelileyo kimi. futhi nanku lapha ukubekwa okupheleleyo koMbhalo, abantu ababili lemihlobo emibili ehlukeneyo.

<sup>53</sup> UJesu wabuya emthonjeni kwesinye isikhathi, kuJohane oNgcwele 4, futhi wahlangana lomfazi waseSamariya. Futhi Wakhuluma kuye okwesikhatshana, waze wafumana ukuthi uhlupho lwakhe lwaluyini. Futhi Wamtshela uhlupho lwakhe. Futhi, lapho Ekwenza, wakunanzelela ukuba nguMesiya. Bangaki abakwaziyo lokho? Khumbula ingxoxo yabo? Yena wathi, “Mfazi, akungiNathise.” Kuyini Ayekwenza? Wayexhumana lomoya wakhe.

<sup>54</sup> Futhi wathi, “Umthombo uyatshona, futhi Awulalutho lokukha ngalo. Kakusiwomkhuba Kini uku, umJuda, ukucela amaSamariya okunjalo.”

<sup>55</sup> Wathi, “Kodwa aluba ubusazi Lowo obukhuluma laye, ubuzaNgicela amanzi.”

56 Futhi-ke ingxoxo yaqhubeka waze Wafumana lokho uhlupho lwakhe olwaluyikho. Bangaki abakwaziyo ukuthi uhlupho lwakhe lwaluyini? Wayephila ebufebeni. Ngakho Wathi, “Hamba uyethatha indoda yakho futhi ubuye lapha.”

Wathi, “Kangilandoda.”

57 Wathi, “Kunjalo. Ube labahlanu, lalowo ophila laye manje kayisiyondoda yakho.”

58 Manje lalala lokho akutshoyo. Wathi, “Mnumzana, ngiyabona ukuthi UnguMprofethi. Siyakwazi lapho uMesiya esiza Uzasisihela izinto lezi. UMesiya, isibonakaliso sikaMesiya, Uzakwenza lokhu lapho Esiza; ngoba Waye nguNkulunkulu Mprofethi, uMprofethi, uMose akhuluma ngaye.” Wathi, “Siyazi uMesiya uzakwenza lokhu lapho Esiza, kodwa Ungubani Wena?”

Wathi, “NgiNguye lowo okhuluma kuwe.”

59 Futhi wagijimela edolobheni futhi watshela amadoda, “Wozani, libone iNdoda Engitshele izinto engizenzileyo. Akusuye lowu uMesiya na?”

60 Futhi lapha kumi umfazi waseTopiya kundoda yaseAnglo-Saxon, isikhathi sokuqala empilweni ukuhlangana; lokho esikubiza umfazi onsundu, indoda emhlophe. Lapho lowombuzo uvuswa lapho, ekubandlululeni, phambi kukaJesu, Wabenza babakwazi ngokuphangisa sibili: akulamehluko ngemibala yabantu. Sonke savela esihlahleni sinye, uAdamu loEva. Khona kanye. Amazwe esaphila kiwo, aguqula ubala lwethu; sasingelalutho lokwenza ngakho. UNkulunkulu wafela izidalwa zonke: umuntu omhlophe, umuntu omnyama, umuntu olithanga, umuntu onsundu, umuntu obomvu, lakho konke. Bonke bayizidalwa zikaNkulunkulu.

61 Kodwa ikhosikazi lime lapha ngokwenye into. Mhlawumbe ulikholwa, mhlawumbe akayisilo. Mhlawumbe uyisoni. Engabe engongcwele. Engabe egula, engabe engaguli. Engabe efuna; uhlupho lwezemali. Engabe emele omunye umuntu. Kangikwazi. Angikaze ngimbone, futhi angila olunye ulwazi lokho alapha ngakho kulolunye ulutho. Futhi ikhosikazi liyakwazi lokho. Kunjalo, khosikazi na? [Udade uthi, “Yebo, mnumzana.”—Mhl.] Nxa kunjalo, phakamisa isandla sakho ukuze abantu babone. Phakamisa nje isandla sakho ukuze abantu. . . Phakamisa nje isandla sakho. Lokhu yikuhlangana kwethu kokuqala. Manje nxa iNkosi uJesu enga. . .

62 Nxa egula, bengingeke ngimsilise ukwedlula ukuba bengingeke ngikusilise. Kodwa nxa—nxa uJesu elapha Wayengeke amsilise, ngoba Usevele wakwenza lapho Esifa eKhalvari. Kodwa Engenza olunye ulutho ukufakaza ukuthi Ulokhu enguJesu ofanayo, futhi engakukholwa, uzasiliswa. Futhi ngesikhathi esifanayo ezakusiliswa, uzakusiliswa, lawe,

nxa ungakukholwa. Kunjalo na? Manje, makuthi iNkosi ikuphe khona. Ngilindele ugcobo lukaMoya oNgcwele, yebo sibili.

<sup>63</sup> Futhi manje, eBizweni likaJesu Khristu, ngithatha umoya wonke phakathi lapha ngaphansi kokulawula kwami, okwenkazimulo kaNkulunkulu.

<sup>64</sup> Manje, khosikazi, ngifuna nje ukuthi ungikhangele okwesikhatshana. Ngifuna ukuthi ukholwe ngenhliziyo yakho yonke. Futhi angila ngitsho umqondo lokho okulandileyo lapha, ukuthi ungubani, ukwedlula loba yini. Kodwa uNkulunkulu uyazi konke ngawe. Kodwa nxa uNkulunkulu engangitshela lokho okulandileyo lapha, khona-ke uzakukholwa ukuthi uJesu Khristu, iNdodana kaNkulunkulu, ilapha ukuyenza lokwenza ngendlela Enza ngayo lapho Elapha emhlabeni?

<sup>65</sup> Umbuthano ungakholwa, ngenhliziyonye?

<sup>66</sup> Manje nanku silapha, inkundla ihleliwe. Sobabili sesiphakamise izandla zethu, kasazani omunye lomunye. UMoya oNgcwele wabhala iBhayibhili, wathi izinto lezi zizakwenzakala kulolusuku, ukuthi uJesu wayevukile kwabafuleyo futhi izinto lezi zizaqhubekela phambili, inkonzo Yakhe izaqhubeka, futhi kulezi insuku zokucina kuzakuba khona kanye ngendlela Akuthembisayo ukuba ngayo. Manje kunjalo na?

<sup>67</sup> Ikhosikazi, njengoba elomnqino, yeboke, uhlikihla izandla zakhe ngoba uzwa okungejwayelekanga ngalesi sikhathi. Hatshi ngoba ume kimi; ngingumfowakhe, bengingeke ngimenze azwe ngaleyo ndlela. Kodwa yena u—yena uyananzelela ukuthi enye into iyenzakala. Futhi uyabona lowo mfanekiso lapho kanye lalokho kuKhanya phezu kwakho, dade? Yikho lokho okukwenza uzwe ngaleyo ndlela. Leyo yileyo Ngilosi yeNkosi, Iphezu kwakho manje. Futhi ulapha ukuthi mina ngikukhulekele, okohlupho lomhlane ohlupheka ngalo. Kunjalo, phakamisa isandla sakho.

<sup>68</sup> Manje uyakholwa na? Bona, enze kwazakale, imfihlo zenhliziyo. Njengalokho Akutshoyo, “Ulamadoda amahlanu.”

<sup>69</sup> Wena uthi ngi...manje, ababuye okokuqala, ungathi, “UMfowethu Branham ukucabangele lokho.”

<sup>70</sup> Asiboneni nxa Kukucabangele. Ngiyakukholwa Kuthe ubulohlupho lomhlane. Bekuqondile lokho na? [Udade uthi, “Yebo.”—Mhl.] Lelo bekuliqiniso na? [“Yebo, mnumzana.”] Futhi wena, ube lokuhlinzwa, lawe, futhi ubuye nje uvela esibhedlela. Futhi, ukuze ubekwazi ukuthi ngiyinceku kaNkulunkulu, indoda yakho ihlezi ngemuva lapho. Futhi ulohlupho, laye. Nxa ngingakutshela lokho okuluhlupho lwendoda yakho, ungakholwa na? [“Yebo, mnumzana.”] Ulohlupho ngohlangothi lwakhe lomhlane wakhe. Kunjalo na? Phakamisa isandla sakho. Ngizakutshela enye into. Ngibona ijaha, indodana yakho, lihlezi ngemuva ngale, lalo. Kuqondile. Futhi indodana yakho lohlobo lwamaphoso. Kunjalo. Nkz. Stovall libizo lakho. Yilo

ibizo lakho, Nkz. Stovall. Hamba ngekhaya, uJesu Khristu usephendule imikhuleko yakho! Ungaba lalokho okucelileyo, eBizweni likaJesu.

<sup>71</sup> Manje kholwa nje! Lonke lina bantu abansundu, kholwani ngenhliziyo yenu yonke manje. Uyananzelela ukuthi uJesu Khristu, iNdodana kaNkulunkulu, uvukile kwabafileyo? Lowo nguMoya Wakhe okwenza uzwe ngaleyondlela.

<sup>72</sup> Manje nangu umfazi omhlophe. Kangimazi, angila mqondo ukuthi ungubani, lokho ayikho, kumbe—kumbe lokho okulandileyo lapha. Nxa kuyikho, phakamisa isandla sakho. Manje uyakholwa na? Nxa uNkulunkulu ethanda, engambula inhliziyi yakhe, njengalokho Akwenza umfazi emthonjeni, njengalokho Akwenza umfazi onsundu, bangaki abantu abamhlophe abangakholwa nxa eNgakwenza? Lapha, mina lomfazi lowu, sonke lezandla zethu ziphezulu, lokhu yikuhlangana kwethu kokuqala.

<sup>73</sup> Ngitsho into eyodwa, ikhosikazi kaliveli khona lapha. Uvele empumalanga, usiza entshonalanga lapho usiza lapha. Kunjalo. Uvela eOhio, futhi idolobho bekuyi Dayton. Kunjalo. Futhi lokho okulandileyo lapha, kungenxa yokuthi ulobuthakathaka. Futhi ulesimo somnqino, ngoba awenelisi ukulala. Uyathatha olunye uhlobo lomuthi okwalokho. Bakubiza “Dixie,” kunjalo, Mason. Kunjalo. Buyela, usuzalala manje, kusukela kulobubusuku kusiya. UJesu Khristu uyakuphilisa. Hamba eBizweni leNkosi.

<sup>74</sup> Nxa ungakholwa! Manje lina phandle lapho kumbuthano, lapho ugcobo lukaMoya oNgewe le lapha, kholwani, lina elingelamakhadi okukhulekelwa.

<sup>75</sup> Uthini ngendoda endala ebimi lapha isikhatshana esedluleyo, leyo, ebingeke i. . . ibingenelisi ukungena emzileni, ibilenombolo engayisiyo, ubengaphi na? Wena, sukuma ngezinyawo zakho. Uyakholwa uJesu Khristu ukuba yiNdodana kaNkulunkulu? Uyangikholwa ukuba ngumprofethi Wakhe? [Umfowethu uthi, “Yebo, mnumzana.”—Mhl.] Kulungile. Ulohlu pho ngamaphaphu akho. Kunjalo. Kukutshiyile manje, hamba ngekhaya futhi uphile! UJesu ukwenzelele iphapho elihle, bona.

Woba lokholo, futhi ukholwe. UNkulunkulu unguNkulunkulu.

<sup>76</sup> Ngabe unjani, mnumzana? Uyakholwa iNkosi uJesu Khristu? [Umfowethu uthi, “Ameni.”—Mhl.]

<sup>77</sup> Manje, kwakulendoda eyabuya kuJesu ngesinye isikhathi, futhi wahamba futhi wasindiswa, futhi wahamba watshela omunye umngane, futhi wamletha. Futhi lumngane. . . Wamtshela ukuthi wayelikholwa. Futhi wamangala ngokuzwa kwakhe, futhi wathi, “Kunini lapho Ongaze khona?”

<sup>78</sup> Wathi, “UFiliphu engakakubizi, lapho ungaphansi kwesihlahla, Ngakubona.” Lokho kwakungamamayila angamatshumi amathathu ubhoda intaba. Ngenyawo, kwamthathela usuku ukuphenduka emzileni wokukhulekelwa, futhi lapho esiza emzileni wokukhulekelwa.

<sup>79</sup> Uyakholwa ukuthi uJesu engangitshela ukuthi uhlupho lwakho luyini? [Umfowethu uthi, “Yebo, mnumzana.”—Mhl.] Ungakholwa ngenhliziyo yakho yonke na? [“Yebo, mnumzana.”] Umbuthano ungakholwa ngenhliziyo yawo yonke? Kabuyelanga okwakhe lapha. Kungokomunye umuntu; futhi lowo ngumfazi, futhi usibekelwe lithunzi lokufa, lowo ngudadewenu. Kakusikho khona kanye owakho...Ngudadewenu ngokuyingxeny. Futhi akakho lapha. Usesibhedlela eTennessee. Ngakho lawe uvela khonale. Futhi wena u...Umfazi ube lokuhlinzwa, kodwa akuzange kuncede lutho. Futhi ume endaweni yakhe. UNkulunkulu akuphe isicelo sakho. Hamba, futhi makuthi uNkulunkulu aphilise umfazi lowo futhi amenze aphile, phezu kwesisekelo sokholo salindona.

<sup>80</sup> Nkosi Nkulunkulu, siyamlahla lowo develi othatha impilo yomfazi lowo. Futhi makuthi lumuntu, oyisihlobo kuye, aphile ngoba ubuyile futhi wama endaweni yakhe. Jesu, Wena wema eKhalvari esikhundleni sethu, futhi Wasisilisa. Futhi siyaKukholwa. Makube njalo. Ameni.

Hamba, ukholwa manje, mfowethu. Ungacabangi ngalutho.

<sup>81</sup> Unjani na? Asazani omunye lomunye. Lesi yisikhathi sethu sokuqala ukuhlangana. (Manje woba nje ngohloniphayo, futhi ulalelisise futhi ukhuleke.) Nxa singazani omunye lomunye, futhi singabafokazi omunye lomunye, mhlawumbe isikhathi sethu sokuqala ukuke sihlangane. Kunjalo na? Nxa lesi kuyisikhathi sokuqala esake sahlangana ngaso, phakamisa isandla sakho. Nxa uNkulunkulu engambula kimi lokho okuluhlupho lwakho, khona-ke uzangikhholwa ukuba yinceku Yakhe na? [“Yebo, ngiyakholwa uyiyi. Uyinceku kaKhristu.”] Ngizakutshela manje. Asikaze sihlangane ngaphambili, kodwa ungumKentucky. Kunjalo. Uvela endaweni ethiwa yiSomerset, Kentucky. Lokhu yikho kanye. Ngivela eBurkesville, Kentucky. Futhi ubulawa luhlupho oluse—lusesiswini, amathumbu, ingxeny yangaphansi. Ngamathumba. Kunjalo. Kulungile, Jewel [“O!”], hamba ubuyele, UNkulunkulu akunike usiliso lwakho. [“O!”]

<sup>82</sup> Uyakholwa yini eNdodaneni kaNkulunkulu, uJesu owavukayo? [Udade uyaklabalala njalo, “O!”—Mhl.] Nxa ungamukela! Ungamangala kungani ikhosikazi lithokoza. Lawe ungakwenza, futhi, [“O!”] nxa wawusesimweni sokufa. [“Dumisa iBizo Lakhe!”]

<sup>83</sup> Kangikwazi. Kodwa angi...Nxa ngingaphambanisi, ngiyakholwa ubhaphathizwe kulokhu kusa, ngoba

ngiyabona wenze into enhle. Kodwa, ukuba kwazi wena, kangikwazi. Ungene nje echibini, futhi lokho kwaku... wa-wabhaphathizwa. Kodwa uyakholwa ukuthi uJesu engambula kimi inhlupho zakho? Umbuthano uyakholwa lokho yini ngenhliziyo zabo zonke na? Ngibona umfazi ebonakala phakathi kwami lawe. Umele lapha umfazi, lomfazi umdala kakhulu kulawe. Ngani, ngumama wakho. Akakho lapha. Uvela eGeorgia. Futhi ulomnqino sibili. Lokho okuyikho, yikuntshintsha kwempilo, ukucina ukuzala komfazi. Futhi umele umama wakho. Lokho kuliqiniso. Awu, uzakuphuma kikho, futhi aphile. Wena hamba, ukholwa manje, kuzaphela konke. Umtshele ukuba lesibindi esihle.

<sup>84</sup> UNkulunkulu akubusise, jaha. Woba lokholo. Kholwa ngenhliziyo yakho yonke. Nxa ungakholwa! Khuleka.

<sup>85</sup> Ngithemba ukuthi wena lami singabafokazi. UNkulunkulu uyakwazi wena futhi Uyangazi mina. Kodwa uNkulunkulu engalwambula kimi uhlupho lwakho? Futhi nxa Engakwenza, ungaMkholwa na?

<sup>86</sup> Bangaki abantu abaphakathi lapha abangakholwa, futhi bathi, “Nkulunkulu, ngizakholwa nxa Ungatshela leyondoda?”

<sup>87</sup> Okwesikhatshana nje. Ikhosikazi elihlezi khona ngemuva kwalamankazana lapha, elikhangele kimi, ubulawa yikuvuvuka kwemithambo yasenyaweni. Futhi uhlezi lapho, ekhulekela omunye umuntu. Futhi umoya wakhe uthinte uMpristi oMkhulu, futhi uphakathi kokuxhumana loNkulunkulu. Ukhulekela umngane wakho, olohlupho lwengqondo. Futhi bahlala e-edolobheni, idolobho elincinyane, yiCorydon, Indiana. Kunjalo. Nxa ungakholwa, ungaba lalokho okucelileyo. Amen.

<sup>88</sup> Ubelesifo senhliziyo; duze lokuphela komgwaqo. Mangikutshela enye yezinhlupho zakho, loba kunjalo, ubhema igwayi. Mana umzuzu, lowo moya weqile khonalapho. Akafuni ukwenza lokho. Yikho lokho okubangela uhlupho lwakho. Lapha, kuyi *lindoda* entsha ehlezi khona lapha, ufuna ukutshiya igwayi, laye. Nxa ungakholwa ngenhliziyo yakhe yonke, umkhuba wegwayi uzasuka. Nxa ungakholwa! Uyakukholwa na? Nxa ungakukholwa futhi usebenze phezu kwakho, ungaba lokukhululwa kwakho; ngakho *lawe* njalo. Awuveli lapha. Uvela khatshana lalapha, lawe. Wena buyela eOwensboro manje, udumisa iNkosi. Woba lokholo kuNkulunkulu.

<sup>89</sup> Ngiyakwazi wena, kodwa kangazi lokho okubi ngawe. Nxa iNkosi ingembula kimi ukuthi uhlupho lwakho luyini, ungaMkholwa? Khona-ke uhlupho lwakho lwesisu luzaphola. Kulungile. Hamba ngekhaya futhi uthokoze, kholwa ngenhliziyo yakho yonke.

<sup>90</sup> Kangikholwa ukuthi ngiyakwazi. Kasazani omunye lomunye? [Udade uthi, “Yebo.”—Mhl.] Liyakukholwa khona lokho engi...? Nxa ngingakutshela iqiniso, uzabakwazi ukuthi

bekuliqiniso kumbe hatshi. ["Yebo."] Kulungile, uhlupho lwakho lwenhliziyo luzakutshiya. Hamba ngekhaya uphile.

<sup>91</sup> Kangikwazi, kodwa uNkulunkulu uyakwazi. Uyakholwa nxa ngingakutshela lokho uhlupho lwakho olwaluyikho, lalapho olwalukhona, uzaphila na? Emhlane wakho. Hamba ngekhaya manje, kuzakutshiya futhi uzakuphila.

<sup>92</sup> Ucabanga ukuthi uNkulunkulu angasilisa lelothumba futhi alenze libekahle, kungela kuhlinzwa? Uyakholwa? Phakamisa izandla zakho nxa ukukholwa. Hamba ngekhaya futhi ukwamukele, eBizweni leNkosi uJesu. Kholwa.

<sup>93</sup> Kuyamangalisa, lapho ngisitsho lokho, ubulento efanayo. Ithumba. Uzwe umuzwa ongewayelekanga lapho ngikhuluma lokho, ngoba yonke imimoya yeqile, ngesikhathi sinye. Hamba, uJesu Khristu uzakuphilisa. Kholwa.

<sup>94</sup> Uyindoda encinyane, ukuba lomkhuhlane wamathambo, kodwa uyakholwa uJesu uzakuphilisa? Nxa ukwenza, hamba uphume, ukholwa, futhi uphiliswe.

<sup>95</sup> Bangaki abakholwayo ngenhliziyo yakho yonke na?

<sup>96</sup> Aluba ngingazange ngikhulume ilizwi kuwe, kodwa ngakutshela uNkulunkulu ukusilisile lapho usiza ejikweni lapho futhi wabalomuzwa ongazwisisekiyo, ungangikholwa na? Hamba ngekhaya, usuphilile. UJesu Khristu uyakuphilisa.

<sup>97</sup> Ungumfazi omutsha ohlupheka ngomnqino. Uyakholwa ukuthi uNkulunkulu uzasilisa lowomnqino futhi awususe kuwe? Ubuzama ukuthola indawo yokuqalela khona. Leyi yiyo lapha. Hamba khathesi, uthokoza, uthaba. Sokuphelile, kuwe. Kholwa ngenhliziyo yakho yonke.

<sup>98</sup> Ulesimo somnqino esibangele uhlupho lwesisu. Usilisiwe lapho uphakama ngemuva ngale, mnumzana. Yiso isizatho ebengikulindele ukuthi ubuye. Qhubeka uhamba, udle ukudla kwakho kwantambama, phila.

<sup>99</sup> Uhlupho lwamakhosikazi, umnqino, ukukhathazeka. Kunjalo. Kuzakutshiya manje. Hamba ngekhaya uphile, eBizweni leNkosi uJesu. Woba lokholo nje.

<sup>100</sup> Ulokuphazamiseka kowesifazana, kunjalo, kubangela ukopha. Isibeletho esivalekileyo. Kholwa, uJesu Khristu uzakuphilisa. Hamba ngekhaya, futhi ukholwe ngenhliziyo yakho yonke.

<sup>101</sup> Manje, ulesimo esibi kakhulu, kusenhliziyweni yakho, kuvimbile. Uyakholwa ukuthi uJesu Khristu uyakuphilisa? [Udade uthi, "Yebo."—Mhl.] Nxa ukukholwa, hamba eBizweni leNkosi, futhi uphile. Woba lokholo kuNkulunkulu.

<sup>102</sup> Kulungile, mfowethu, uyakholwa ukuthi uJesu Khristu uyakuphilisa, lawe? Hamba nje phansi emzileni, udumisa iNkosi nje.

103 Bangaki phandle lapho manje abakholwayo eNkosini uJesu? Uyakwazi konke. . .

104 Nkz. Nash, ngiyakwazi, kodwa angeke ngisize lokho kuKhanya okubambelele phezu kwakho. Ngiyakwazi, kodwa ukhulekela omunye umuntu. Ngumntwana omncinyane, umntwana omncane, akahlali lapha. Uhlala phansi eTennessee. Njalo, ukhulekela umngane wakho ongudokotela olohlupho lwenhliziyo. Futhi umkakhe usanda nje ukoma umhlubulo kancinyane. Kunjalo. Kholwa, futhi ungaphila.

105 Ikhosikazi elincinyane elihlezi ekucineni kwesihlalo lapho, lomunwe wakhe emlonyeni wakhe, ucabangani, khosikazi elincane? Ube lokubanjwa ngumngqino. Uyesaba ukuba lomunye. Kunjalo. Nxa kunjalo, phakamisa isandla sakho, lapho usesula inyembezi zakho emehlweni akho. Ungesabi, futhi kawusoze ubelakho.

106 Ikhosikazi elihlezi eceleni kwakho lapho, ule-asima, uhlupho lwemithambo emaphatshini. Yekela ukubhema, kuzakutshiya.

107 Woba lokholo kuNkulunkulu. Kholwa ngenhliziyo yakho yonke. Nxa ungakholwa, zonke izinto ziyenzeka!

108 Nanti ikhosikazi lihlezi ngemuva kwaleli khosikazi lapha. Ngileqiniso u. . .Ikhosikazi, okwesikhatshana nje, ibizo lakhe nguNkz. Evans. Uvela eKentucky, Louisville. Kunjalo. Kangikwazi. Uyakwazi lokho kuliqiniso. Ulohlupho lwenhliziyo, ulohlupho ngendlebe zakho. Kunjalo. Nxa kuyikho, phakamisa isandla sakho. Buyela eLouisville, uJesu Khristu uyakuphilisa.

109 Ngiyagolomba ukholo lwenu, eBizweni likaJesu Khristu, ukukukholwa. Ukhona ophakathi lapha, kholwa ngenhliziyo yakho yonke! Khonale emuva emsamu, omiyo khonale ngemuva, wena kholwa. Awudingi ukuba sendaweni ethile. Ngale kuleli icele, kholwani! Bangaki ngemuva ngale abadinga ukusiliswa? Phakamisa izandla zakho, futhi uthi, “Ngiyakholwa, Nkosi.” Woba lokholo!

110 Ehlezi khona emuva *ngakulindlela* lapha, ngibona indoda ikhuleka iqinisekile, embonweni, umi lapho, ungumtshumayeli, umi ngakuphuluphithi, futhi uyatshumayela okokwanda. . .ekhulekela ukukhula kwenkonzo yakhe. Angikaze ngimbone ngaphambili empilweni yami. Kodwa yikho lokho okukhulekelayo, mfowethu. Uzakuba lakho manje. Kholwa eNkosini uJesu!

111 Kulendoda ehlezi ngemuva kwakhe lapho, olento engalunganga ngengalo yakhe, amafindo engalweni yakhe. Njalo u. . .Nxa ungakukholwa, mnumzana, ungaba lokusila kwakho. Amen.



<sup>112</sup> Phandle nje *lapha* ekucineni komzila lowu lapha, owesibili e, ikhosikazi elincinyane elekhanda lakhe liphansi, khona ngemuva ngasemuva ehlezi lapho ekhuleka, ulohlupho lwesifo senyongo. Yikho lokho, khosikazi, uyaphakamisa isandla sakho, futhi ngiyazi nguwe—nguwe wena lowo obekade ukhuleka. Wamukele ukusila kwakho nje lapho.

<sup>113</sup> Uthini ngakho, uyakholwa uJesu wavuka kwabafileyo? Ulapha Yena manje na? LiyamKholwa na? Khona-ke nxa lingikholwa, nxa ngilitshele iQiniso leBhayibhili, futhi uNkulunkulu usephendukile futhi waqinisa ukuthi ngilitshele iQiniso, lokho kutsho ukuthi, ngokupheleleyo lokho, iNkosi uJesu ilapha. Kunjalo na?

<sup>114</sup> Khona-ke yenzani lokhu, yenzani lokhu, lingathandabuzi, bekani izandla zenu phezu komunye umuntu ohlezi eceleni kwakho. Ngizakhuleka kusukela khona lapha, leqembu lenu lonke lizakusiliswa khona manje nxa lizakukholwa. Lizakukholwa na? Bekani izandla zenu omunye phezu komunye, khona-ke. Bonke labo abakholwayo ukuthi lizakusiliswa manje, wothini, “Ameni.” [Ibandla lithi, “Ameni.”—Mhl.] Manje wena. . .Ngizakutsho lumkhuleko. Liwukhuleke, liwukhuluke emva kwami:

<sup>115</sup> O Nkosi, Mdali wamaZulu lomhlaba, Msunguli weMpilo engapheliyo, Muphi wesipho sonke esihle, ngilesidingo, Nkosi, okwamandla Akho asilisayo. Futhi ngiyakhuleka ukuthi Uzanginika ukholo ukukwamukela. Leso yisithembiso Sakho. Ngiyakholwa ukuthi UnguJesu ofanayo owahamba okhunjini lwaseGalili, wahlupheka engaphansi kukaPontius Pilatho, wafa, wavuka, wenyukela Phezulu, wanikeza izipho ebantwini, ngoMoya oNgcwele. Ngiyakholwa uMoya oNgcwele ulapha uqhuba umsebenzi ofanayo lowo Owawenzayo lapho Usaselapha. Ngiyasingatha isithembiso lesa. Ngiyamukela ukusila kwami. Ngiyathembisa ukuKuphilela lokulalela iMilayo Yakho, ukuhamba ekuKhanyeni. Futhi manje ngiyakholwa, ngoba ngenze isivumo lesi, ukuthi ngisilisiwe ngamanxeba Akho.

<sup>116</sup> Hlalani lithule sibili. Manje cabanga nje, lesa yisivumo sakho, uNkulunkulu uyeza kuwe khona manje. Phefumulani uMoya oNgcwele, ngokholo, “Ngiyakholwa ukuthi isimo sami siyasiliswa. Ngiyakholwa ukuthi umkhuhlane wami wonke usususiwe.” Ukhona manje eBukhoneni bukaNkulunkulu. Kaliwuzwa yini lowo Moya? Vulani inhliziyu zenu, ukholo lwenu—lwenu. UMoya oNgcwele usilisa abantu khona manje; inkazana encinyane ehlezi lapha nje, eyinye kwesokunene sami. Ipulatifomu yonke ikhangeleka ukuba ikhanyiswe ngaMandla kaKhristu ovukileyo. Uphezu kombuthano. Usebantwini. Manje, lowo bekungumkhuleko wakho.

117 Manje ngizakulikhulekela futhi ngicele udeveli wokuthandabuza asuke khatshana lani.

118 O Nkosi Nkulunkulu, Mdali wamaZulu lomhlaba, zwana umkhuleko wami, Nkosi; ngokuphangisa, lapho uMoya oNgewele usaselapha, abantu bengakabhubhi.

119 Ngiyalahla udeveli! UJesu Khristu wakuthathela ukunqoba, Wayinqoba eKhalvari; Yena wanqoba phezu kokufa, udeveli, isihogo, lengwaba, futhi wavuka njalo ngosuku lwesithathu, futhi uyaphila kuze kube nininini. Phuma phakathi lapha, Sathane, uyisidalwa esinqotshiweyo. Tshiya abantu laba, futhi ubavumele basiliswe, eBizweni leNkosi uJesu Khristu.

120 Lonke elamukela ukusiliswa kwenu, sukumani ngezinyawo zenu khona manje. EBizweni likaJesu Khristu, phakamani! Ameni. Phakamisa izandla zenu Kuye, futhi liMdmumise. Abantu kuphela engibabonayo abangaphakamanga, kulendoda ehlezi lapha esihlalweni esilamasondo, uGane Heelie. Ngiyakwazi ukuthi udaba lwakhe luyini, uludaba lwepholiyo.

121 Kukhangeleka sengathi isihlalo esilamasondo ngemuva *lapha*. Kasiboneni. Kukhona udaba, ikhosikazi lilomlenze owodwa. Kunjalo na? Uyangikholwa ukuba ngumprofethi kaNkulunkulu? Ngingumfokazi kuwe. Angeke ngikusilise. Kodwa uyakholwa ukuthi uNkulunkulu engangitshela ukuthi uhlupho lwakho luyini? [Udade uthi, “Yebo.”—Mhl.] Nxa kungakwenza, kungakusiza na? Ulomkhuhlane wetshekela. Lokho kuliqiniso. Manje kukholwe, futhi uhambe ngekhlaha uphile, esihlalweni esilamasondo. Yikho kuphela omele ukwenze, yikukholwa eNkosini uJesu Khristu, futhi usiliswe!

122 Phakamisa izandla zakho manje, futhi—futhi uthi, “Ngiyabonga, Nkosi, ngokungisilisa. Ngiyabonga, Nkosi, ngokungisilisa. NgiyakuDumisa, Nkosi, ngokungisilisa. UNkulunkulu ulungile! UNkulunkulu mkhulu! UNkulunkulu uligugu! UNkulunkulu uqotho! UNkulunkulu ulapha! UMoya oNgewele ulapha. Amandla kaNkulunkulu alapha. Futhi manje ngiyakholwa ngakho konke okukimi, ukuthi uJesu Khristu, iNdodana kaNkulunkulu, uyangiphilisa. Ameni.”

123 Nxa kukhona omunye lapha olahlwe ngesono, futhi esazi ukuthi izono zakho azikho ngaphansi kweGazi, futhi khona manje eBukhloneni bukaNkulunkulu, Owazi imicabango yakho, futhi uMoya oNgewele ungitsihela lokhu, ungathanda ukuMamukela njengoMsindisi oqondane lawe, ufuna ukukhunjulwa emkhulekweni na? Phakamisa izandla zakho, lonke eliphakathi lapha. UNkulunkulu akubusise, lawe, lawe, lawe, lawe. Kunjalo. Emuva ngale, wena, langapha. Sibili. Emuva lapha, uNkulunkulu akubusise, ndodana. UNkulunkulu akubusise laphana. Futhi uNkulunkulu akubusise. Kunjalo.

124 Bona, uMoya oNgewele awungeke uphambanise. Lapho uMoya oNgewele esithi... Bengilungiselela ukunikela inkonzo

kuMfowethu Neville, ngoba usiliso soluphelile, kodwa enye Into yathi, “Bafuna ukusiliswa komphefumulo.” Nxa ufuna ukwamukela uJesu njengo Msindisi oqondane lawe, khotamisa ikhanda lakho okwesikhatshana nje. Asinikeleni umkhuleko.

<sup>125</sup> Mfowethu Neville, ngitshe ilizwi kakhulu, wena nikeza lumkhuleko, ungakwenza. Kulungile.

<sup>126</sup> [UMfowethu Neville uyakhuleka, “Baba oseZulwini, eBizweni leNkosi uJesu Khristu, Ohambe ngokukhazimula okukhulu lapha phakathi kwethu lobubusuku, njengalaba abakhotamisa amakhanda abo, ngokukholwa lobubusuku, bekhola ukuthi Uyanelisa ukubakhulula, konke umphefumulo lomzimba, sindisa labo abakholwayo manje ekholweni lokuphenduka. Nkulunkulu othandekayo, makuthi ubusuku lobu bube yibusuku obahlukileyo kubo. Banike manje isifiso, O Nkulunkulu. Futhi banike manje, O Nkosi Jesu, lololwazi olufiswayo kangako lwezono ezithethelelweyo. Sindisa umuntu wonke, O Nkulunkulu, labo abakhotamisa amakhanda abo phandle lapho, abacele ukuthakazelela umkhuleko. Futhi makuthi bona, kusukela kulesi sikhathi kusiya, mabahlose enhliziyweni zabo ukuMphilela Lowo owabafelayo. EBizweni likaJesu langenxa kaJesu siyakhuleka. Ameni, futhi ameni. Dumisa iNkosi!”—Mhl.] 

59-0329E Isibonakaliso SikaMesiya  
Branham Thabhanekeli  
Jeffersonville, Indiana U.S.A.

NDEBELE

©2024 VGR, ALL RIGHTS RESERVED

VOICE OF GOD RECORDINGS, ZIMBABWE OFFICE  
8 ST. ANNES ROAD, AVONDALE, HARARE, ZIMBABWE

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Isaziso ngelungelo lokwenza

Amalungelo wonke agodliwe. Leli ibhuku lingadindwa ngomtshina wokudinda owangekhaya ngokuzisebenzisela, kumbe ukwabela, kungela mbadalo, njengesikhali sokusabalalisa iVangeli lika Jesu Khristu. Leli ibhuku alingeke lathengiswa, kumbe landiswe ngesimo esikhulu, lisakazwe kuwebhusayithi, ligcinwe endaweni lapho elingaphinda litholakale, lichasiswe ngezinye izilimi, kumbe lisetshenziswe ekuceleni izimali kungela mvumo elotshiweyo ngabe Voice Of God Recordings®.

Ukuze uthole ulwazi olunengi kumbe ezinye izinto ezikhona ezilusizo, siyacela thintha abe:

VOICE OF GOD RECORDINGS, ZIMBABWE OFFICE  
8 ST. ANNES ROAD, AVONDALE, HARARE, ZIMBABWE

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)